

# Machemol e bisje longsumer

Om vergangene Freidaach noochmiddaach hotts bei uns geschellt unn de Karl hott vor de Dier gestonne. Ei gude, Honnes, hott er gesacht, ich will joo nit störn, awwer was machsden so bei dem scheene Wedder?

Ich habben om Arm genumme: Komm eroi, ich sitz am Compjuder, awwer ich machen gleich aus unn doo kenne merr uns e bisje uff die Terrass setze.

De Karl wollt nit ins Haus eroi: Eichnetlich wollt ich dich frooche, obde e Stichelche mett merr spaziern gehst. Awwer störn will ich dich werkllich nit, wennde vill Arweit host mett doim Compjuder.

Naa, habb ich emm zur Antwort gewwe, dess kann ich aach noch später mache. Die Fraa iss sowieso om Latwerschkoche, dess dauert noch drei Stund, doo kenne mir zwaa grad emol e Rund bis iwwer die Wart laafe. Es schad nix, wenn ich emol e bisje longsumer mach.

Siehsde, sacht de Karl, genau doodriwwer wollt ich emol mett derr redde.

Mir zwaa sinn dann außem Haus unn hinner de Heiser de Wartweech enuff. Geschwätzt hawwe merr erstemol nix, awwer ich habb schunn gemerkt, dass de Karl was uffem Herze hatt. Also Karl, habb ich dann oogefonge, wass issen mettem longsumer mache. Doodemett hosde doch nit mich gemoont?

Naa, gibt de Karl zur Antwort, seit ichs vorsjoor so mettem Kreislauf hatt, sacht merr die Paula fast jeden Daach: Karl, mach emol e bisje longsumer. Awwer ich denk monchmol, ich werdd joo genau wie du bald Sibzich unn doo habb ich nimmi die Zeit um longsumer ze mache. Ich habb doch noch so vill vor unn unseroom kann joo jeden Daach was bassiern, unn deshalb will ich noch e bisje was ferdich kriehe.

Ich sach: Was willsde dann ferdich kriehe, Karl?

De Karl druff: Ei ich will emol die gonze Fotos von de Kinner unn von unserne Reise oiklewe, will dezu schreiwe, wonn unn wo dess alles war, will moi gonse Video-Filme von de Familie unn von de Flerschemer Feste sordiern unn uff Kassette nemme, unn dann habb ich noch de Gadde in de Reih ze halle unn im Haus is immer was ze bossele, wie soll ich doo longsom mache? Aach beim Audofahrn, ich fahr joo werkllich nit schnell, sacht die Paula immer: Mach emol e bisje longsumer, mir hawwe doch Zeit, ich habb doch heit nix mehr ze due.

Ich habb e noochdenklich Gesicht gemacht: Ja, dess mettem longsom mache iss leicht gesacht, doi Fraa schafft doch aach de gonze Daach. Unn wie ich die Paula kenn, macht die aach nit longsom. Awwer sie moonts halt gut, sie will halt dassderr nix bas-

siert unn dassde koon Herzinfarkt kriehe dust. Unn iwwers longso-  
mer mache wollsde emol mett merr redde?

De Karl druckst erum: Eichentlich nit.

Ich gucken oo: Iwwer was dann, Karl?

Ei doodriwwer, de Karl hott gonz verschämt geguckt, dass ich  
monchmol nit longsomer mache soll.

So langsam ging mir e Licht uff: Unn wonn sollsde nit longsomer  
mache, saach merrs.

De Karl hott Mut gefasst: So zwaa, dreimol im Monat, wenn die  
Paula on mir vorbei nooch owwe guckt unn sacht, dass die Schloof-  
zimmerdeck widder mol gestriche werrn misst, dann sachtse aach:  
Auf Karl, machemol e bisje schneller, ich habb heit noch mehr ze  
due. Unn jetzt det ich gern wisse: Iss dess aach bei eich so?

Eiern Honnes